

摘藻堂四庫全書薈要

史部



欽定四庫全書薈要卷六千二百二十八

遼史卷一百三

元中書右丞相總裁托克托等修

列傳第三十三

文學上

遼起松漠太祖以兵經略方內禮文之事固所未遑及  
太宗入汴取晉圖書禮器而北然後制度漸以修舉至  
景聖間則科目聿興士有由下僚擢陞侍從駸駸崇儒



之美但其風氣剛勁三面鄰敵歲時以蒐獮為務而典章文物視古猶闕然二百年之業非數君子為之綜理則後世惡所考述哉作文學傳

蕭罕嘉努字糾堅納喇部人中書令安圖之孫少好學弱冠入南山讀書博覽經史通遠漢文字統和十四年始仕家有一牛不任驅策其奴得善價鬻之罕嘉努曰利已誤人非吾所欲乃歸直取牛二十八年為右通進典南京栗園重熙初同知三司使事四年遷天成軍節



度使徙彰愍宮使帝與語才之命為詩友嘗從容問曰

卿居外有異聞乎罕嘉努對曰臣惟知炒栗小者熟則大者必生大者熟則小者必焦使大小均熟始為盡美不知其他蓋嘗掌栗園故託栗以諷諫帝大笑詔作四時逸樂賦帝稱善時詔天下言治道之要制問徭役不加于舊征伐亦不常有年穀既登帑廩既實而民重困豈為吏者慢為民者惰歟今之徭役何者最重何者尤苦何所蠲省則為便益補役之法何可以復盜賊之害



何可以止罕嘉努對曰臣伏見比年以來高麗未賓準  
布猶強戰守之備誠不容已乃者選富民防邊自備糧  
糗道路修阻動淹歲月比至屯所費已過半隻牛單穀  
鮮有還者其無丁之家倍直傭僦人憚其勞半途亡竄  
故戍卒之食多不能給求假于人則十倍其息至有鬻  
子割田不能償者或逋後不歸在軍物故則復補以少  
壯其鴨渌江之東戍後大率如此況渤海女直高麗合  
從連衡不時征討富者從軍貧者偵候加之水旱菽粟



不登民以日困蓋勢使之然也方今最重之後無過西  
戍如無西戍雖遇凶年困弊不至於此若能徙西戍稍  
近則往來不勞民無深患議者謂徙之非便一則損威  
名二則召侵侮三則棄耕牧之地臣謂不然準布諸部  
自來有之曩時北至臚朐河南至邊境人多散居無所  
統壹惟往來抄掠及太祖西征至於流沙準布望風悉  
降西域諸國皆願入貢因遷種落內置三部以益吾國  
不營城邑不置戍兵準布累世不敢為寇統和間皇太



妃出師西域拓土既遠降附亦衆自後一部或叛鄰部  
討之使同力相制正得馭遠人之道及城哈屯開境數  
千里西北之民徭役日增生業日殫警急既不能救叛  
服亦復不恒空有廣地之名而無得地之實若貪土不  
已漸至虛耗其患有不勝言者况邊情不可深信亦不  
可頻絕得不為益捨不為損國家大敵惟在南方今雖  
連和難保他日若南方有變屯戍遼邈卒難赴援我進  
則敵退我還則敵來不可不慮也方今太平已久正可



恩結諸部釋罪而歸地內徙戍兵以增堡障外明約束以正疆界每部各置酋長歲修職貢叛則討之服則撫之諸部既安必不生釁如是則臣雖不能保其久而無變知其必不深入侵掠也或云棄地則損威殊不知殫費竭財以貪無用之地使彼小部抗衡大國萬一有敗損威豈淺或又云沃壤不可遽棄臣以為土雖沃民不能久居一旦敵來則不免內徙豈可指為吾土而惜之夫帑廩雖隨部而有此特周急部民一偏之惠不能均



濟天下如欲均濟天下則當知民困之由而窒其隙節  
盤遊簡驛傳薄賦歛戒奢侈期以數年則困者可蘇貧  
者可富矣蓋民者國之本兵者國之衛兵不調則曠軍  
役調之則損國本且諸部皆有補役之法昔補役始行  
居者行者類皆富實故累世從戎易為更代近歲邊虞  
數起民多匱乏既不任役事隨補隨缺苟無上戶則中  
戶當之曠日彌年其窮益甚所以取代為艱也非惟補  
役如此在邊戍兵亦然譬如一抔之土豈能填尋丈之



壑欲為長久之便莫若使遠戍疲兵還於故鄉薄其徭役使人人給足則補役之道可以復故也臣又聞自昔有國家者不能無盜比年以來羣黎凋弊利於剽竊良民往往化為凶暴甚者殺人無忌至有亡命山澤基亂首禍所謂民以困窮皆為盜賊者誠如聖慮今欲芟夷本根願陛下輕徭省役使民務農衣食既足安習教化而重犯法則民趨禮義刑罰罕用矣臣聞唐太宗問羣臣治盜之方皆曰嚴刑峻法太宗笑曰寇盜所以滋者



由賦歛無度民不聊生今朕內省嗜欲外罷游幸使海  
內安靜則寇盜自止由此觀之寇盜多寡皆由衣食豐  
儉徭役重輕耳今宜徙哈屯城於近地與西南副都部  
署烏爾古德呼勒威烏爾古等部聲援相接罷黑嶺二  
軍并開保州皆隸東京益東北戍軍及南京總管兵增  
修壁壘候尉相望繕完樓櫓浚治城隍以為邊防此方  
今之急務也願陛下裁之擢翰林都林牙兼修國史詔  
曰文章之職國之光華非才不用以知文學為時大儒



是用授卿以翰林之職朕之起居悉以實錄自是日見  
親信每入侍賜坐遇勝日帝與飲酒賦詩以相醺酢君  
臣相得無比罕嘉努知無不言雖諂諛不忘規諷十三  
年春上疏曰臣聞先世約尼溫汗之後國祚中絕自額  
爾奇木聶呼立蘇爾威大位始定然上世俗朴未有尊  
稱臣以為三皇禮文未備正與約尼同後世之君以禮  
樂治天下而崇本追遠之義興焉近者唐高祖創立先  
廟尊四世為帝昔我太祖代約尼即位乃製文字修禮



法建天皇帝名號制宮室以示威服興利除害混一海  
內厥後累聖相承自額爾奇木呼哩以下大號未加太  
祖之考額爾奇木達魯猶以名呼臣謂宜依唐典追崇  
四祖為皇帝則陛下弘業有光墜典復舉矣疏奏帝納  
之始行追冊立德二祖之禮罕嘉努每見帝獵未嘗不  
諫會有司奏獵秋山熊虎傷死數十人罕嘉努書于冊  
帝見命去之罕嘉努既出復書他日帝見之曰史筆當  
如是帝問罕嘉努我國家創業以來孰為賢主罕嘉努



以穆宗對帝怪之曰穆宗嗜酒喜怒不常視人猶草芥  
卿何謂賢罕嘉努對曰穆宗雖暴虐省徭輕賦人樂其  
生終穆之世無罪被戮未有過今日秋山傷死者臣故  
以穆宗為賢帝默然詔與耶律庶成錄約尼汗至重熙  
以來事迹集為二十卷進之十五年復詔之曰古之治  
天下者明禮義正法度我朝之興世有明德雖中外嚮  
化然禮書未作無以示後世卿可與庶成酌古準今制  
為禮典事或有疑與北南院同議罕嘉努既被詔博考



經籍自天子達于庶人情文制度可行於世不繆於古者譔成三卷進之又詔譯諸書罕嘉努欲帝知古今成敗譯通歷貞觀政要五代史時帝以其老不任朝謁拜歸德軍節度使以善治聞帝遣使問勞罕嘉努表謝召修國史卒年七十二有六義集十二卷行于世

李澣初仕晉為中書舍人晉亡歸遼當太宗崩世宗立恟恟不定澣與高勳等十餘人羈留南京久之從歸上京授翰林學士穆宗即位累遷工部侍郎時澣兄濤在



汴為翰林學士密遣人召澣澣得書託求醫南京易服

夜出欲遁歸汴至涿為徼巡者所得送之南京下吏澣  
伺獄吏熟寢以衣帶自經不死防之愈嚴械赴上京自  
投黃河中流為鐵索牽掣又不死及抵上京帝欲殺之  
時高勲已為樞密使救止之屢言於上曰澣本非負恩  
以母年八十急於省覲致罪且澣富於文學方今少有  
倫比若留掌詞命可以增光國體帝怒稍解仍令禁錮  
于奉國寺凡六年艱苦萬狀會上欲建太宗功德碑高



敷奏曰非李瀚無可秉筆者詔從之文成以進上悅釋  
囚尋加禮部尚書宣政殿學士卒

論曰統和重熙之間務修文治而罕嘉努對策落落累  
數百言槩可施諸行事亦遼之晁賈哉李瀚雖以詞章  
見稱而其進退不足論矣

遼史卷一百三



遼史卷一百三考證

蕭罕嘉努傳天皇帝之考額爾奇木達魯 按太祖本  
紀贊德祖名薩喇達為太祖之父世為約尼氏之額  
爾奇木即此所云天皇帝之考也然此云名達魯與  
本紀異而契丹國志又作太祖父名幹里諸書所載  
不同謹識以備考



遼史卷一百三考證



欽定四庫全書薈要卷六千二百二十九

遼史卷一百四

元中書右丞相總裁托克托等修

列傳第三十四

文學下

王鼎字虛中涿州人幼好學居太寧山數年博通經史  
時馬唐俊有文名燕薊間適上已與同志被襖水濱酌  
酒賦詩鼎偶造席唐俊見鼎撲野置下坐欲以詩困之



先出所作索賦鼎援筆立成唐俊驚其敏妙因與定交  
清寧五年擢進士第調易州觀察判官改漆水縣令累  
遷翰林學士當代典章多出其手上書言治道十事帝  
以鼎達政體事多咨訪鼎正直不阿人有過必面詆之  
壽隆初陞觀書殿學士一日宴主第醉與客忤怨上不  
知已坐是下吏狀聞上大怒杖黥奪官流鎮州居數歲  
有赦鼎獨不免會守臣召鼎為賀表因以詩貽使者有  
誰知天雨露獨不到孤寒之句上聞而憐之即召還復



職乾統六年卒鼎宰縣時憇于庭俄有暴風舉卧榻空中鼎無懼色但覺枕榻俱高乃曰吾中朝端士邪無干正可徐置之須臾榻復故處風遂止

耶律昭字述寧博學善屬文統和中坐兄國留事流西北部會蕭達林為西北路招討使愛之奏免其役禮致門下欲召用以疾辭達林問曰今軍旅甫罷三邊晏然惟準布伺隙而動討之則路遠難至縱之則邊民被掠增戍兵則餽餉不給欲苟一時之安不能終保無變計



將安出昭以書答曰竊聞治得其要則仇敵為一家失其術則部曲為行路夫西北諸部每當農時一夫為偵候一夫治公田二夫給糶官之役大率四丁無一室處芻牧之事仰給妻孥一遭寇掠貧窮立至春夏賑恤吏多雜以糠粃重以掊克不過數月又復告困且畜牧者富國之本有司防其隱沒聚之一所不得各就水草便地兼以逋亡戍卒隨時補調不習風土故日瘠月損馴至耗竭為今之計莫若振窮薄賦給以牛種使遂耕獲



置游兵以防盜掠頒俘獲以助伏臘散畜牧以就便地  
期以數年富疆可望然後練簡精兵以備行伍何守之  
不固何動之不克哉然必去其難制者則餘種自畏若  
捨大而謀小避強而攻弱非徒虛費財力亦不足以威  
服其心此二者利害之機不可不察昭聞古之名將安  
邊立功在德不在衆故謝玄以八千破苻堅百萬休格  
以五隊敗曹彬十萬良由恩結士心得其死力也閤下  
膺非常之遇專方面之寄宜遠思古人以就勲業上觀



乾象下盡人謀察地形之險易料敵勢之虛實慮無遺策利施後世矣達林然之開泰中獵于巴爾圖山為羈羊所觸卒

劉輝好學善屬文疏簡有遠略太康五年第進士大安末為太子洗馬上書言西邊諸蕃為患士卒遠戍中國之民疲于飛輓非良久之策為今之務莫若城于鹽澤實以漢戶使耕田聚糧以為西北之費言雖不行識者肆之壽隆二年復上書曰宋歐陽修編五代史附我朝



於四夷妄加貶訾且宋人賴我朝寬大許通和好得盡  
兄弟之禮今反令臣下妄意作史恬不經意臣請以趙  
氏初起事蹟詳附國史上嘉其言遷禮部郎中詔以賢  
良對策輝言多中時病擢史館修撰卒

耶律孟簡字復易裕悅烏哲之五世孫父劉嘉努官至  
節度使孟簡性穎悟六歲父晨出獵俾賦曉天星月詩  
孟簡應聲而成父大奇之既長善屬文太康初樞密使  
耶律伊遜以姦險竊柄出為中京留守孟簡與耶律庶



箴表賀未幾伊遜復舊職銜之謫巡磁窯關時雖以讒  
見逐不形辭色遇林泉勝地終日忘歸明年流保州及  
聞皇太子被害不勝哀痛以詩傷之作放懷詩二十首  
自序云禽獸有哀樂之聲螻蟻有動靜之形在物猶然  
況於人手然賢達哀樂不在窮通禍福之間易曰樂天  
知命故不憂是以顏淵簞瓢自得此知命而樂者也予  
雖流放以道自安又何疑耶太康中始得歸鄉里詣闕  
上表曰本朝之興幾二百年宜有國史以垂後世乃編



耶律嚇魯烏哲休格三人行事以進上命置局編修孟簡謂餘官曰史筆天下之大信一言當否百世從之苟無明識好惡徇情則禍不測故左氏司馬遷班固范氏俱罹殃禍可不慎歟乾統中遷六院部太保處事不拘文法時多笑其迂孟簡聞之曰上古之時無簿書法令而天下治蓋簿書法令適足以滋姦倖非聖人致治之本改高州觀察使修學校招生徒遷昭德軍節度使以中京饑詔與學士劉嗣昌減價糶粟事未畢卒



耶律古裕字糾堅六院部人父阿古齊官至節度使古裕冲澹有禮法工文章統和中為本部太保開泰中稍遷塔布城節度使鞠霸州疑獄稱旨授啟聖軍節度使太平中復為本部太保謝病歸俄擢南院大王歎風俗日頹請老不許興宗命為詩友數問治要多所匡建奉詔與林牙耶律庶成蕭罕嘉努編遼國上世事迹及諸帝實錄未成而卒年九十

論曰孔子言誦詩三百授之以政不達雖多亦奚以為



王鼎忠直達政劉輝侍青宮建言國計昭陳邊防利害  
皆洞達聞敏孟簡疾伊遜姦邪黜而不怨孰謂文學之  
士無益於治哉



遼史卷一百四



遼史卷一百四考證

王鼎傳乾統六年卒 按原本無卒字考鼎召還復職  
不言更貶為令其暴風舉榻事當在前宰漆水縣時  
史蓋于既卒後附誌此事而遺脫卒字文義遂不相  
屬謹據永樂大典增



遼史卷一百四考證



欽定四庫全書薈要卷六千二百三十

遼史卷一百五

元中書右丞相總裁托克托等修

列傳第三十五

能吏

漢以璽書賜二千石唐疏刺史縣令于屏以示獎率故  
二史有循吏良吏之傳遼自太祖創業太宗撫有燕薊  
任賢使能之道亦畧備矣然惟朝廷參置國族官吏州



縣多遵唐制歷世既久選舉益嚴時又分遣重臣巡行  
境內察賢否而進退之是以治民理財決獄弭盜各有  
其人考其德政雖未足以與諸循良之列抑亦可謂能  
吏矣作能吏傳

大公鼎渤海人先世籍遼陽率賓縣統和間徙遼東豪  
右以實中京因家于大定曾祖忠禮賓使父信興中主  
簿公鼎幼莊愿長而好學咸雍十年登進士第調瀋州  
觀察判官時遼東雨水傷稼北樞密院大發瀕河丁壯



以完提防有司承令峻急公鼎獨曰邊障甫寧大興役  
事非利國便農之道乃疏奏其事朝廷從之罷役水亦  
不為災瀕河千里人莫不悅改良鄉令省徭役務農桑  
建孔子廟學部民服化累遷興國軍節度副使時有隸  
鷹坊者以羅畢為名擾害田里歲久民不堪公鼎言于  
上即命禁戢會公鼎造朝大臣諭上嘉納之意公鼎曰  
一郡獲安誠為大幸他郡如此者衆願均其賜于天下  
從之徙長春州錢帛都提點車駕如春水貴主例為假



貨公鼎曰豈可輟官用徇人情拒之頗聞怨詈語曰此

吾職不敢廢也俄拜大理卿多所平反天祚即位歷長

寧軍節度使南京副留守改東京戶部使時盜殺留守

蕭保先始利其財因而倡亂民亦互生猜忌家自為鬪

公鼎單騎行郡陳以禍福衆皆投兵而拜曰是不我欺

敢弗聽命安輯如故拜中京留守賜貞亮功臣乘傳赴

官時盜賊充斥有遇公鼎于路者即叩馬乞自新公鼎

給以符約俾還業聞者接踵而至不旬日境內清肅天



祚聞之加賜保節功臣時人心反側公鼎慮生變請布  
恩惠以安之為之肆赦公鼎累表乞歸不許會奴賊張  
薩巴率無賴嘯聚公鼎欲擊而勢有不能嘆曰吾欲謝  
事久矣為世故所牽不幸至此豈命也夫因憂憤成疾  
保大元年卒年七十九子昌齡左承制昌嗣洛州刺史  
昌朝鎮寧軍節度

蕭文字國華外戚之賢者也父直善安州防禦使文篤  
志力學喜愠不形太康初掌秦越國王中丞司事以才



幹稱尋知北面帖黃王邦彥子爭蔭數歲不能定有司以聞上命文詰之立決車駕將還宮承詔閱習儀衛雖執事林林指顧如一遷同知奉國軍節度使歷國舅都監壽隆未知易州兼西南面安撫使高陽土沃民富吏其邑者每黷于貨民甚苦之文始至悉去舊弊務農桑崇禮教民皆化之時大旱百姓憂甚文禱之輒雨屬縣又蝗議捕除之文曰蝗天災捕之何益但反躬自責蝗盡飛去遺者亦不食苗散在草莽為烏鵲所食會淫雨



不止文復隨禱而霽是歲大熟朝廷以文可大用遷唐  
古部節度使高陽勒石頌之後不知所終

馬人望字儼叔高祖胤卿為石晉青州刺史太祖兵至  
堅守不降城破被執太祖義而釋之徙其族于豎巫閭  
山因家焉曾祖廷煦南京留守祖淵中京副留守父詮  
中京文思使人望穎悟幼孤長以才學稱咸雍中第進  
士為松山縣令歲運澤州官炭獨役松山人望請于中  
京留守蕭托歡均役他邑托歡怒下吏繫幾百日復引



詰之人望不屈蕭喜曰君為民如此後必大用以事聞  
于朝悉從所請徙知涿州新城縣縣與宋接境驛道所  
從出人望治不擾吏民畏愛近臣有聘宋還者帝問以  
外事多薦之擢中京度支司鹽鐵判官轉南京三司度  
支判官公私兼裕遷警巡使京城獄訟填委人望處決  
無一寃者會檢括戶口未兩旬而畢同知留守蕭保先  
怪而問之人望曰民產若括之無遺他日必長厚歛之  
弊大率十得六七足矣保先謝曰公慮遠吾不及也先



是樞密使伊遜竊弄威柄卒害太子及天祚嗣位將討  
父仇選人望與蕭報恩究其事人望平心以處所活甚  
衆改上京副留守會劇賊趙鍾格犯闕劫宮女御物人  
望率衆捕之右臂中矢炷以艾力疾馳逐賊棄所掠而  
遁人望令關津譏察行旅悉獲其盜尋擢樞密都承旨  
宰相耶律儼惡人望與己異遷南京諸宮提轄制置歲  
中為保靜軍節度使有二吏兇暴民畏如虎人望假以  
辭色陰令發其事黥配之是歲諸處饑乏惟人望所治



粒食不闕路不鳴桴遙授彰義軍節度使遷中京度支  
使始至府廩皆空視事半歲積粟十五萬斛錢二十萬  
緡徙左散騎常侍累遷樞密直學士未幾拜參知政事  
判南京三司使事時錢粟出納之弊惟燕為甚人望以  
縑帛為通歷凡庫物出入皆使別籍名曰臨庫姦人黠  
吏莫得軒輊乃以年老揚言道路朝論不察改南院宣  
徽使以示優老踰年天祚手書宣馬宣徽四字詔之既  
至諭曰以卿為老誤聽也遂拜南院樞密使人不敢干



以私用人必公議所當與者如曹勇義虞仲文嘗為姦人所擠人望推薦皆為名臣當時民所甚患者驛遞馬牛旗鼓鄉正廳隸倉司之役至破產不能給人望使民出錢官自募役時以為便久之請老以守司徒兼侍中致仕卒諡曰文獻人望有操守喜怒不形未嘗附麗求進初除執政家人賀之人望愀然曰得勿喜失勿憂抗之甚高擠之必酷其畏慎如此

耶律都勒幹字伊實音季父房之後廩約重義重熙末



給事誥勅院咸雍中累遷同知南京留守事被召以部  
民懇留賜詔褒獎太康初改西南面招討使為北面林  
牙遷左伊勒希巴大安中拜南府宰相壽隆初致仕卒  
都勒幹所至有聲吏民畏愛及退居鄉里子布庫為烏  
爾古部節度使遣人來迎既至見積委甚富謂子曰辭  
親入仕當以裕國安民為事枉道欺君以苟貨利非吾  
志也命駕而歸布庫後為盜所殺

楊遵勗字益誠涿州范陽人重熙十九年登進士第調



儒州軍事判官累遷樞密院副承旨咸雍三年為宋國  
賀正使還遷都承旨天下之事叢于樞府簿書填委導  
勗一目五行俱下剖決如流敷奏詳敏上嘉之奉詔徵  
戶部逋錢得四十餘萬緡拜樞密直學士改樞密副使  
太康初參知政事徙知樞密院事兼門下侍郎平章事  
拜南府宰相即律伊遜誣皇太子詔導勗與雅克案其  
事導勗不敢正言時議短之尋拜北府宰相大安中暴  
卒年五十六贈守司空諡康懿子晦終昭文館直學士



王崇涿州新城人博古善屬文重熙十五年擢進士鄉貢禮部廷試對皆第一累遷上京鹽鐵使或誣以賄無狀釋之遷東京戶部使太康二年遼東饑民多死請振恤從之三年入為樞密副使拜南府宰相大安末卒崇練達朝政臨事不怠在政府修明法度有聲

論曰孟子論民為貴社稷次之司牧者當如何以盡心公鼎奏罷完隄役以息民拒公主假貸以守法單騎行郡化盜為良庶幾召杜之美文知易州雨暘應禱蝗不



為災人望為民不避囚繫判度支公私兼裕亦卓乎未  
易及已都勒幹吏畏民愛楊遵勗決事如流真能吏哉



遼史卷一百五



遼史卷一百五考證

蕭文傳後不知所終 按宏簡錄云蕭文遷唐古部節  
度使卒而本傳乃云不知所終謹附識



遼史卷一百五考證



欽定四庫全書薈要卷六千二百三十一

遼史卷一百六

元中書右丞相總裁托克托等修

列傳第三十六

卓行

遼之共國任事耶律蕭二族而已二族之中有退然自足不淫於富貴不詘於聲利可以振頽風激薄俗亦足嘉尚者得三人焉作卓行傳



蕭扎拉字實訥北府宰相巴雅爾之弟性介特不事生  
業保寧間以戚屬進至寧遠軍節度使秩滿里居淡泊  
自適統和末召為南京馬步軍都指揮使以疾求退不  
聽遷伊勒希巴又辭疾許之遂入頡山杜門不出上嘉  
其志不復徵扎拉自是家于頡山親友或過之終日言  
不及世務凡宴遊相邀亦不拒一歲山居過半與世俗  
不偶耶律資忠重之目曰頡山老人卒

耶律官弔字奚隱林牙幹魯之孫沉厚多學詳於本朝



世系嗜酒好佚初徵為宿直將軍重熙九年以疾去官  
上以官努屬尊欲成其志乃許自擇一路節度使官努  
辭曰臣愚鈍不任官使加歸義軍節度使輒請致政官  
努與烏哩特人蕭幹友善幹謂官努曰仕不能致主澤  
民成大功烈何屑屑為也吾與若居林下以枕簟自隨  
觴詠自樂雖不官無嫌焉官努然之時稱二逸乾統間  
卒

蕭普爾普字綏蘭魏國王惠之四世孫父母蚤喪鞠于



祖烏爾古納性孝悌年十三烏爾古納卒以早失怙恃  
復遭祖喪哀毀踰禮族里嘉歎嘗謂人曰我於親不得  
終養今誰為訓者苟不自勉何以報鞠育恩自是力學  
於文藝無不精乾統間以烏爾古納之故召之不應與  
親識遊獵山水奉養無長物僕隸欣欣如也或曰公胡  
不念以嗣先世功名答曰自度不足以繼先業年踰強  
仕安能益主庇民累徵皆以疾辭晚年謝絕人事卜居  
瑪古山屏遠輦茹潛心佛書延有道者談論彌日人問



所得何如但曰有深樂惟覺六鑿不相攘餘無知者一日易服無疾而逝

論曰隱固未易為也而亦未可輕以與人若扎拉謝職不談時務官旁兩辭節鎮普爾普召而不赴雖未足謂之隱然在當時能知內外之分甘於肥遯不猶愈於求富貴利達而為妻妾羞者哉故稱卓行可也



遼史卷一百六



遼史卷一百六考證

耶律官努傳乾統間卒

按原本書官努卒官努二字

係衍今據列傳體例刪



欽定四庫全書

卷一百六考證

遼史卷一百六考證



欽定四庫全書薈要卷六千二百三十二

遼史卷一百七

元中書右丞相總裁托克托等修

列傳第三十七

列女

男女居室人之大倫與其得烈女不若得賢女天下而有烈女之名非幸也詩讚衛共姜春秋褒宋伯姬蓋不得已所以重人倫之變也遼據北方風化視中土為疎



終遼之世得賢女二烈女三以見人心之天理有不與世道存亡者

邢簡妻陳氏營州人父陞五代時累官司徒陳氏甫笄涉通經義凡覽詩賦輒能誦尤好吟詠時以女秀才名之年二十歸於簡孝舅姑閨門和睦親黨推重有六子陳氏親教以經後二子抱朴抱質皆以賢位宰相統和十二年卒睿智皇后聞之嗟悼贈魯國夫人刻石以表其行及遷祔遣使以祭論者謂貞靜柔順婦道母儀始



終無歉云

耶律氏太師達魯之妹小字常格幼爽秀有成人風及長操行修潔自誓不嫁能詩文不苟作讀通歷見前人得失歷能品藻咸雍間作文以述時政其畧曰君以民為體民以君為心人主當任忠賢人臣當去比周則政化平陰陽順欲懷遠則崇恩尚德欲強國則輕徭薄賦四端五典為治教之本六府三事實生民之命淫侈可以為戒勤儉可以為師錯枉則人不敢詐顯忠則人不



敢欺勿泥空門崇飾土木勿事邊鄙妄費金帛滿當思  
溢安必慮危刑罰當罪則民勸善不實遠物則賢者至  
建萬世磐石之業制諸部強橫之心欲率下則先正身  
欲治遠則始朝廷上稱善時樞密使耶律伊遜愛其才  
屢求詩常格遺以回文伊遜知其諷已銜之太康三年  
皇太子坐事伊遜誣以罪按無跡獲免會兄達魯謫鎮  
州常格與俱嘗布衣蔬食人問曰何自苦如此對曰皇  
儲無罪遭廢我輩豈可美食安寢及太子被害不勝哀



痛年七十卒于家

耶律努妻蕭氏小字意辛國舅駙馬都尉托斯和之女  
母呼都克公主意辛美姿容年二十適努事親睦族以  
孝謹聞嘗與娣姒會爭言厭魅以取夫寵意辛曰厭魅  
不若禮法衆問其故意辛曰修己以潔奉長以敬事夫  
以柔撫下以寬毋使君子見其輕易此之為禮法自然  
取重於夫以厭魅獲寵獨不愧於心乎聞者大慙初努  
與樞密使伊遜有隙及皇太子廢被誣奪爵没入興聖



宮流烏爾古部上以意辛公主女欲使絕婚意辛辭曰

陛下以妾葭莩之親使免流竄實天地之恩然夫婦之

義生死以之妾自笄年從努一旦臨難頓爾乖離背綱

常之道於禽獸何異幸陛下哀憐與努俱行妾即死無

恨帝感其言從之意辛久在貶所親執役事雖勞無難

色事夫禮敬有加于舊壽隆中上書乞子孫為著帳郎

君帝嘉其節召舉家還子國隱乾統間始仕保大中意

辛在臨漢謂諸子曰吾度盧彥倫必叛汝輩速避我當



死之賊至遇害

耶律珠展妻蕭氏小字頗勒本國舅貝勒之女性端慤  
有容色自幼與他女異年十八歸珠展謹裕貞婉娣姒  
推尊之及居珠展喪極哀毀既葬謂所親曰夫婦之道  
如陰陽表裏無陽則陰不能立無表則裏無所附妾今  
不幸失所天且生必有死理之自然珠展早歲登朝有  
才不壽天禍妾身罹此酷罰復何依恃儻死者可見則  
從不可見則當與諸侍婢慰勉竟無回意自刃而卒



耶律中妻蕭氏小字綏蘭韓國王惠之四世孫聰慧謹  
愿年二十歸於中事夫敬順親戚咸譽其德中嘗謂曰  
汝可粗知書以前貞淑為鑑遂發心誦習多涉古今天  
慶中為賊所執潛置刃於履誓曰人欲汙我者即死之  
至夜賊遁而免久之帝召中為五院都監中謂妻曰吾  
本無宦情今不能免我當以死報國汝能從我乎綏蘭  
對曰謹奉教及金兵徇地嶺西盡徙其民中守節死綏  
蘭悲戚不形於外人怪之俄躍馬突出至中死所自殺



論曰陳氏以經教二子並為賢相耶律氏自潔不嫁居  
閨閫之內而不忘忠其君非賢而能之乎三蕭氏之節  
雖烈丈夫有不能者矣



遼史卷一百七



欽定四庫全書薈要卷六千二百三十三

遼史卷一百八

元中書右丞相總裁托克托等修

列傳第三十八

方技

孔子稱小道必有可觀醫卜是已醫以濟天札卜以決猶豫皆有補於國有惠於民前史錄而不遺故傳

珠勒呼吐谷渾人初太祖破吐谷渾一騎士棄橐反射



不中而去及追兵開橐視之中得一嬰兒即珠勒呼也  
因所俘者問其故乃知射橐者嬰之父也世善醫雖馬  
上視疾亦知標本意不欲子為人所得欲殺之耳由是  
進於太祖淳欽皇后收養之長亦能醫專事鍼灸太宗  
時以太醫給侍嘗撰脉經諸鍼灸書行世年九十卒  
王白冀州人明天文善卜筮晉司天少監太宗入汴得  
之應歷十九年王子札穆以事下獄其母求卜白曰此  
人當王未能殺也母過憂景宗即位釋其罪封寧王竟



如其言凡決禍福多此類保寧中歷彰武興國二軍節度使撰百中歌行于世

魏璘不知何郡人以卜名世太宗得于汴天祿元年上命馳馬較遲疾以為勝負問王白及璘孰勝白奏曰赤者勝璘曰臣所見驄馬當勝既馳竟如璘言上異而問之白曰今日火王故知赤者勝璘曰不然火雖王而上有煙以煙察之青者必勝上嘉之五年察克謀逆私卜于璘璘始卜謂曰大王之數得一日矣宜慎之及亂果



敗應歷中周兵犯燕上以勝敗問璘璘曰周姓柴也燕  
分火也柴入火必焚其言果驗璘嘗為太平王雅斯哈  
卜僭立事上聞之免死流烏爾古部一日節度使召璘  
有獻雙鯉者戲曰君卜此魚何時得食璘良久答曰公  
與僕不出今日有不測禍矣暇食魚急命烹之未及食  
寇至俱遇害

耶律達魯字緞布幹其先本五院之族始置宮分隸焉  
達魯精于醫察形色即知病原雖不診候有十全功統



和初為大丞相韓德讓所薦官至節度使初樞密使耶律色珍妻有沈疴易數醫不能治達魯視之曰心有畜熱非藥石所及當以意療因其瞶聵之使狂用泄其毒則可於是令大擊鉦鼓於前翌日果狂叫呼怒罵力極而止遂愈治法多此類人莫能測年八十卒

耶律伊伯格勤字錫訥六院郎君尼固察之後幼好學尤長卜筮不樂仕進嘗為人擇葬地曰後三日有牛乘人逐牛過者即啓土至期果一人負乳犢引犗牛而過



其人曰所謂牛乘人者此也遂啓土既葬吉凶盡如其言又為失鷹者占曰鷹在汝家東北三十里灤西榆上往求之果得當時占候無不驗

論曰方技術者也苟精其業而不畔于道君子必取焉珠勒呼王白即律達魯無大得失錄之宜矣魏璘為察克卜謀逆為雅斯哈卜僭立罪在不貫雖有寸長亦奚足取哉存而弗削為來者戒

遼史卷一百八



欽定四庫全書薈要卷六千二百三十四

遼史卷一百九

元中書右丞相總裁托克托等修

列傳第三十九

伶官

伶官之微者也五代史列鏡新磨於傳是必有所取矣  
遼之伶官當時固多然能因詼諧示諫以消未形之亂  
惟羅衣輕耳孔子曰君子不以人廢言是宜傳



羅衣輕不知其鄉里滑稽通變一時諧謔多所規諷興  
宗敗於李元昊也單騎突出幾不得脫先是元昊獲遼  
人輒剗其鼻有奔北者惟恐追及故羅衣輕止之曰且  
觀鼻在否上怒以毳索繫帳後將殺之太子笑曰打譚  
底不是黃幡綽羅衣輕應聲曰行兵底亦不是唐太宗  
上聞而釋之上嘗與太弟重元狎昵宴酣許以千秋萬  
歲後傳位重元喜甚驕縱不法又因雙陸賭以居民城  
邑帝屢不競前後已償數城重元既恃梁孝王之寵又



多鄭叔段之過朝臣無敢言者道路以目一日復博羅衣輕指其局曰雙陸休癡和你都輸去也帝始悟不復戲清寧間以疾卒

### 宦官

周禮寺人掌中門之禁至巷伯詩列于雅勅貂功著于晉雖忠於所事而非其職矣漢唐中世竊權蠹政有不忍言者是皆寵遇之過遼宦者二人其賢不肖皆可為後世鑑故傳焉



王繼恩棣州人。睿知皇后南征，繼恩被俘。初，皇后以公  
私所獲十歲以下兒容貌可觀者近百人，載赴涼陘，並  
使閹為豎。繼恩在焉，聰慧通書及遼語，擢內謁者。內侍  
左廂押班聖宗親政，累遷尚衣庫使、左承宣、監門衛大  
將軍、靈州觀察使、內庫都提點。繼恩好清談，不喜權利。  
每得賜賚，市書至萬卷，載以自隨，誦讀不倦。每宋使來，  
聘繼恩多充宣賜使，後不知所終。

趙安仁字小喜，深州樂壽人。自幼被俘，統和中為黃門。



令秦晉國王府祇候王薨授內侍省押班御院通進開

泰八年與李勝哥謀奔南土為游兵所擒初仁德皇后  
與欽哀有隙欽哀密令安仁伺皇后動靜無不知者仁  
德皇后威權既重安仁懼禍復謀亡歸仁德欲誅之欽  
哀以言營救聖宗曰小喜言父母兄弟俱在南朝每念  
及神魂隕越今為思親冒死而亡亦孝子用心實可憐  
憫赦之重熙初欽哀攝政欲廢帝立少子重元帝與安  
仁謀遷太后慶州守陵授安仁左承宣監門衛大將軍



充契丹漢人渤海內侍都知兼都提點會上思太后親  
馭奉迎太后責曰汝負萬死我嘗營救不望汝報何為  
離間我母子邪安仁無答後不知所終

論曰名器所以勵天下非賢而有功則不可授況宦者  
乎繼思為內謁者安仁為黃門令似矣何至溺於私愛  
而授以觀察使大將軍耶易曰負且乘致寇至此安仁  
所以不克有終繼思幸而免與

遼史卷一百九



欽定四庫全書  
安卷六千二百三十五

遼史卷一百十

元中書右丞相總裁托克托等修

列傳第四十

姦臣上

春秋褒貶善惡並書示勸懲也故遷固傳佞幸酷吏歐陽修則并姦臣錄之將俾為君者知所鑒為臣者知所戒此天地聖賢之心國家安危之機治亂之原也遼自



耶律伊遜而下姦臣十人其敗國皆足以為戒故列於傳

耶律伊遜字呼都克琨五院部人父達喇家貧服用不給人號窮達喇初伊遜母方娠夜夢手搏殺羊拔其角尾既寤占之術者曰此吉兆也羊去角尾為王字汝後有子當王及伊遜生適在路無水以浴迴車破轍忽見湧泉達喇自以得子欲酒以慶聞酒香于草棘間得二榼因祭東焉伊遜幼慧黠嘗牧羊至日昃達喇視之伊



遜熟寢達喇觸之覺伊遜怒曰何遽驚我適夢人手執  
日月以食我我已食月啗日方半而覺惜不盡食之達  
喇自是不令牧羊及長美風儀外和內狡重熙中為文  
班吏掌太保印陪從入宮皇后見伊遜詳雅如舊宦命  
補筆硯吏帝亦愛之累遷護衛太保道宗即位以伊遜  
先朝任使賜漢人戶四十同知點檢司事常召決疑議  
陞北院同知歷樞密副使清寧五年為南院樞密使改  
知北院封趙王九年耶律仁先為南院樞密使時駙馬



都尉蕭呼圖克與重元黨惡仁先在朝曰仁先可任西北路招討使帝將從之伊遜奏曰臣新參國政未知治體仁先乃先帝舊臣不可遽離朝廷帝然之重元亂平拜北院樞密使進王魏賜匡時翊聖竭忠平亂功臣咸雍五年加守太師詔四方有軍旅許以便宜從事勢震中外門下饋賂不絕凡阿順者蒙薦擢忠直者被斥竄太康元年皇太子始預朝政法度修明伊遜不得逞謀以事誣皇后后既死伊遜不自安又欲害太子乘間入



奏曰帝與后如天地並位中宮豈可曠盛稱其黨駙馬  
都尉蕭錫默之妹美而賢上信之納于宮尋冊為皇后  
時護衛蕭和克知伊遜姦狀伏橋下欲殺之俄暴雨壞  
橋謀不遂林牙蕭巖壽密奏曰伊遜自皇太子預政內  
懷疑懼又與宰相張孝傑相附會恐有異圖不可使居  
要地出為中京留守伊遜泣謂人曰伊遜無過因讒見  
出其黨蕭默輩以其言聞於上上悔之無何遂出蕭巖  
壽為順義軍節度使詔近臣議召伊遜事北面官屬無



敢言者耶律薩喇曰初以蕭巖壽奏出伊遜若所言不當宜坐以罪若當則不可復召累諫不從乃復召為北院樞密使時皇太子以母后之故憂見顏色伊遜黨欣躍相慶讒謗沸騰忠良之士斥逐殆盡伊遜因蕭錫沙之言夜召蕭德勒台謀構太子令護衛太保耶律察喇誣告耶律薩喇等同謀立皇太子詔按無迹而罷又令牌印郎君薩額都溫詣上誣首耶律察喇前告耶律薩喇等事皆實臣亦與其謀本欲殺伊遜等而立太子臣



等若不言恐事白連坐詔使鞠劾伊遜迫令具伏上怒命誅薩喇及蘇色等伊遜恐帝疑引數人庭詰各令荷重校繩繫其頸不能出氣人人不堪其酷惟求速死反奏曰別無異辭時方暑尸不得瘞以至地臭乃囚皇太子於上京監衛者皆其黨尋遣蕭達魯噶薩巴害太子伊遜黨大喜聚飲數日上京留守蕭塔坦以卒聞上哀悼欲召其妻伊遜陰遣人殺之以滅其口五年正月上將出獵伊遜奏留皇孫上欲從之同知點檢蕭烏納諫



曰陛下若從伊遜留皇孫皇孫尚幼左右無人願留臣  
保護以防不測遂與皇孫俱行由是上始疑伊遜頗知  
其姦會比幸將次黑山之平定上適見扈從官屬多隨  
伊遜後惡之出伊遜知南院大王事及例削一字王爵  
改王混同意稍自安及赴闕入謝帝即日還宮改知興  
中府事七年冬坐以禁物鬻入外國下有司議法當死  
伊遜黨耶律雅克獨奏當入八議得減死論擊以鐵骨  
朶幽於來州後謀奔宋及私藏兵甲事覺縊殺之乾統



二年發塚戮其屍

張孝傑建州永霸縣人家貧好學重熙二十四年擢進士第一清寧間累遷樞密直學士咸雍初坐誤奏事出為惠州刺史俄召復舊職兼知戶部司事三年參知政事同知樞密院事加工部侍郎八年封陳國公上以孝傑勤幹數問以事為北府宰相漢人貴幸無比太康元年賜國姓明年秋獵帝一日射鹿三十燕從官酒酣命賦雲上于天詩詔孝傑坐御榻傍上誦黍離詩知我者



謂我心憂不知我者謂我何求孝傑奏曰今天下太平  
陛下何憂富有四海陛下何求帝大悅三年羣臣侍燕  
上曰先帝用仁先華格以賢智也朕有孝傑伊邈不在  
仁先華格下誠為得人歡飲至夜乃罷是年夏伊邈譖  
皇太子孝傑同惡相濟及伊邈受詔按皇太子黨人誣  
害忠良孝傑之謀居多伊邈薦孝傑忠於社稷帝謂孝  
傑可訖狄仁傑賜名仁傑乃許放海東青鵲六年既出  
伊邈上亦悟孝傑姦佞尋出為武定軍節度使坐私貶



廣濟湖鹽及擅改詔旨削爵貶安肅州數年乃歸大安  
中死於鄉乾統初剖棺戮屍以族產分賜臣下孝傑久  
在相位貪貨無厭時與親戚會飲嘗曰無百萬兩黃金  
不足以為宰相家初孝傑及第詣佛寺忽迅風吹傑撲  
頭與浮圖齊墜地而碎有老僧曰此人必驟貴然亦不  
得其死竟如其言

耶律雅克字善寧季父房之後四世祖對音太祖異母  
弟父曰呼魯蘇官至太師雅克狡佞而敏清寧間為左



護衛太保太康初轉北面林牙初耶律伊遜自中京留守復為樞密使以雅克為耳目凡聞見必以告伊遜愛而薦之帝亦以為賢拜左伊勒希巴及太子被誣帝遣雅克往訊之太子謂雅克曰帝惟我一子今為儲嗣復何求敢為此事公與我為昆弟行當念無辜達意於帝禱之甚懇蕭錫沙聞之謂雅克曰宜以太子言易為伏狀雅克領之盡如所教以奏及太子被逐伊遜殺害忠良多雅克之謀為契丹行宮都部署五年夏拜南府宰



相遷特哩袞大安三年為西京留守致仕壽隆初卒

蕭錫沙摩和納部人父都勒幹厯官節度使錫沙辨點  
善揣摩人意清寧間以年勞遷護衛太保太康初耶律  
伊遜復入樞府益橫恣時錫沙出入伊遜家以朝臣不  
附者輒使出之錫沙由宿衛遷殿前副點檢三年夏護  
衛蕭和克等謀殺伊遜事覺下獄錫沙謂伊遜曰今太  
子猶在臣民屬心大王素無根柢之助復有誣皇后之  
怨若太子立王置身何地宜熟計之伊遜曰吾憂此久



矣是夜召蕭德勒台謀所以構太子事錫沙計既行尋遷殿前都點檢兼同知樞密院事復令蕭額都溫等誣首耶律察喇前告耶律薩喇等事皆實詔究其事太子不服遣伊勒希巴耶律雅克問太子太子具陳所以見誣之狀錫沙聞之謂雅克曰如此奏則大事去矣當易其辭為伏款雅克入如錫沙言奏之上大怒廢太子太子將出曰我何罪至是錫沙叱令登車遣衛卒闔車門是年遷北院樞密副使復陳陰害太子計伊遜從之及



伊遜出知南院大王事亦出錫沙為保州統軍使卒乾  
統間剖棺戮屍二子達勒達年結皆伏誅



遼史卷一百十





總校官原候補府臣葉佩蓀

校對官編修臣吳錫麒

謄錄監生臣孫樹新



欽定四庫全書薈要

史部

遼史卷一百一十五



詳校官祭酒臣韋謙恒



欽定四庫全書薈要卷六千二百三十六

遼史卷一百十一

元中書右丞相總裁托克托等修

傳第四十一

姦臣下

蕭額哩頁字訛都溫國舅阿拉次子便佞滑稽善女工  
重熙間以外戚進清寧初補祗候郎君尚鄭國公主拜  
駙馬都尉累遷南面林牙以父阿拉為蕭格所譖出額



哩頁為奉先軍節度使十年冬召為北面林牙咸雍中  
會有告額哩頁與族人珠展謀害耶律伊遜按無狀出  
為寧遠軍節度使自後額哩頁揣伊遜意傾心事之薦  
為國舅詳袞太康初封遼西郡王時伊遜擅恣凡不附  
己者出之乃引額哩頁為北府宰相兼知契丹行宮都  
部署事及伊遜謀構皇太子額哩頁多助成之遂知北  
院樞密使賜推誠協贊功臣以女姪妻伊遜子蘇頁恃  
勢橫肆至有無君之語朝野側目帝出伊遜知南院大



王事坐與伊遜黨以天平軍節度使歸第尋拜西北路  
招討使以母憂去官卒

耶律赫魯字和多沁六部錫里尼古察之後柔佞喜苟  
合仕清寧初時伊遜引用羣小赫魯附之遂見委任俄  
擢南面林牙伊遜譖皇太子殺忠直赫魯多預其謀弟  
烏頁亦黨伊遜時號二賊伊遜薦為北院大王卒烏頁  
亦至南院大王

蕭德勃岱約尼溫汗宮分人善阿意順辭色清寧初伊



遜用事甚見引用累遷北面林牙同知北院宣徽使事及皇太子廢遣德勒岱監送上京德勒岱促其行不令下車起居飲食數加陵侮至則築園堵囚之太康中遷西南招討使歷順義軍節度使轉國舅詳袞壽隆五年坐怨望以老免死闔門籍興聖宮貶西北統軍司卒二子特默額呼乾統間以父與伊遜謀伏誅

蕭額都溫國舅少父房之後咸雍中補牌印郎君太康三年樞密使伊遜陰懷逆謀乃令護衛太保耶律察叅



誣告耶律薩喇等廢立事詔按無狀皆補外頃之額都  
溫希伊遜意欲實其事與耶律托卜嘉等入闕誣奏耶  
律薩喇等謀害伊遜欲立皇太子事臣以預謀今不自  
言恐事泄連坐帝果怒徙皇太子于上京額都溫尚皇  
女趙國公主為駙馬都尉後與伊遜議不合銜之復以  
車服僭擬人主被誅額都溫臨刑語人曰前告耶律薩  
喇事皆伊遜教我恐事彰殺我以滅口耳

蕭達嚕噶約尼縑古汗宮分人心術姦險清寧間伊遜



為樞密使竊權用事陰懷逆謀達魯噶比附之遂見獎  
拔稍遷至旗鼓伊喇詳袞伊遜欲害太子以達魯噶允  
果可使遣與近侍直長薩巴詣上京同留守蕭塔坦夜  
引力士至囚室紿以有赦召太子出殺之函其首以歸  
詐云疾薨以達魯噶為國舅詳袞達魯噶恐殺太子事  
白出入常佩刀有急召即欲自殺乾統間詔樞密使耶  
律阿蘇大索伊遜黨人達魯噶以賂獲免後以疾卒

耶律托卜嘉仲父房之後以善擊鞠幸於上凡馳騁鞠



不離杖咸雍初補祗候郎君與耶律伊遜善故內外畏之及太子被譖按無迹托卜嘉附伊遜欲實其誣與額都溫等密奏太子謀亂事本實臣不首恐事覺連坐帝信之廢太子改延慶宮副使壽隆元年為行宮都部署天祚嗣位以托卜嘉黨伊遜出為特們部節度使及樞密使耶律阿蘇大索伊遜舊黨托卜嘉以賂免徙德呼勒部節度使復為敦睦宮使天慶元年出為西北路招討使以疾卒



蕭特古斯字和寧綽台部人仕重熙中以能稱累遷左中丞清寧初厯北面林牙改北院樞密副使辨敏善伺顏色應對合上意皇太后嘗曰有大事非耶律華格蕭特古斯不能決眷遇日隆知北院樞密使事六年出知黃龍府八年拜南府宰相頃之為北院樞密使詔許便宜從事為人姦佞有餘好聚斂專愎變更法度為樞密數月所薦引多為重元黨與由是免為庶人後没入興聖宮卒



論曰舜流共工孔子誅少正卯治姦之法嚴矣後世不  
是之察反以為忠而信任之不至於流毒宗社而未已  
道宗之於伊邇是也當其留仁先討重元若真為國計  
者不知包藏禍心待時而發耳一旦專權又得孝傑雅  
克錫沙為之腹心故肆惡而無忌憚始誣皇后又殺太  
子及其妃其禍之酷良可悲哉嗚呼君之所親莫皇后  
太子若也姦臣殺之而不知羣臣言之而不悟一時忠  
黨廢戮幾盡雖黑山親見官屬之盛僅削一字王號至



私藏甲兵然後誅之吁伊遜之罪固非一死可謝天下  
抑以道宗不明無斷有以養成之也如蕭額哩頁輩忘  
君黨惡以饗富貴雖幸而死諸牖下其得免於遺臭之  
辱哉

遼史卷一百十一



欽定四庫全書蒼要卷六千二百三十七

遼史卷一百十二

元中書右丞相總裁托克托等修

列傳第四十二

逆臣上

易曰天尊地卑乾坤定矣卑高以陳貴賤位矣貴賤位而後君臣之分定君臣之分定而後天地和天地和而後萬化成五帝三王之治用此道也三代而降臣弑其



君者有之子弑其父者有之孔子作春秋以寓王法誅  
死者於前懼生者於後其慮深遠矣歐陽修作唐書創  
逆臣傳蓋亦春秋之意也遼叛逆之臣二十有二迹其  
事則又有甚焉者然豈一朝一夕之故哉列於傳所以  
公天下之貶以示夫戒云

希達字納爾琿肅祖孫額爾奇木塔喇之子幼黠而辯  
險佞者多附之約尼哈陶津汗時異母兄阿古齊爲達  
喇部額爾奇木故事爲額爾奇木者得行再生禮阿古



齊方就帳易服希達遂取紅袍貂蟬冠乘白馬出令黨  
人大呼曰額爾奇木出矣衆羅拜因行柴冊禮自立為  
額爾奇木與裕悅耶律實魯同知國政及實魯遇害希  
達懼人圖已挈其二子德勒台朔格奔渤海偽為失明  
後因毬馬之會與二子奪良馬奔歸國益為姦惡常以  
巧辭獲免太祖將即位讓希達希達曰皇帝聖人由天  
所命臣豈敢當太祖命為裕悅及自將伐西南諸部希  
達誘埒克等亂不從者殺之車駕還至赤水城希達懼



與埒克俱北走至榆河為追兵所獲太祖問曰朕初即位嘗以國讓叔父辭之今反欲立吾弟何也希達對曰始臣不知天子之貴及陛下即位衛從甚嚴與凡庶不同臣嘗奏事心動始有窺覷之意度陛下英武必不可取諸弟懦弱得則易圖也事若成豈容諸弟乎太祖謂諸弟曰汝輩乃從斯人之言耶達喇曰謀大事者須用如此人事成亦必去之希達不復對囚數月縊殺之將刑太祖謂曰叔父罪當死朕不敢赦事有便國者宜悉



言之希達曰達喇部人衆勢弱故多為亂宜分為二以弱其勢子德勒台

德勒台字海蘭有膂力善馳射馬蹟不仆尤神於醫視人疾若隔紗覩物莫不悉見太祖在潛已加眷遇及即位拜達喇部額爾奇木太祖思鹿醢解醒以山林所有問能取者德勒台曰臣能得之乘內廐馬逐鹿射其一欲復射馬跌而德勒台持躍而前弓猶不弛復獲其一帝歡甚曰吾弟萬人敵會帝患心痛召德勒台視之德



勒台曰膏肓有疾血如彈丸然藥不能及必鍼而後愈  
帝從之嘔出瘀血痛止帝以其親每加賜賚然知其爲  
人未嘗任以職後從埒克亂與其父希達俱縊殺之

華格字薩蘭隋國王實魯之子性陰險初烝其父妾懼  
事彰與剋蕭特依順等共害其父歸咎特依順華格獲  
免太祖即位務廣恩施雖知華格凶逆姑示含忍授以  
特哩袞六年華格預諸弟之亂事平羣臣議其罪皆謂  
華格不可釋於是與子罕扎俱凌遲而死勅軍士恣取



其產帝曰華格不畏上天反君弑父其惡不可言諸弟作亂皆此人教之也

察克字烏紳明王安圖之子善騎射貌恭而心狡人以爲懦太祖曰此兇頑非懦也其父安圖嘗使奏事太祖謂近侍曰此子目若風駝面有反相朕若獨居無令入門世宗即位於鎮陽安圖聞之欲持兩端察克曰太弟忌刻若果立豈容我輩永康王寬厚且與瑠格相善宜往與計安圖即與瑠格謀歸世宗及和議成以功封泰



寧王會安圖爲西南面大詳袞察克佯爲父惡陰遣人  
白於帝即召之既至上前泣訴不勝哀帝憫之使領鈕  
祜祿軍出入禁中數被恩遇帝每出獵察克託手疾不  
操弓矢但執鍊鎚馳走屢以家之細事聞於上上以爲  
誠察克以諸族屬雜處不克以逞漸從廬帳迫於行宮  
右皮室詳袞耶律烏珍察其姦邪表列其狀帝不信以  
表示察克察克稱烏珍疾已哽咽流涕帝曰朕固知無  
此何至泣耶察克時出怨言烏珍曰汝雖無是心因我



過疑汝勿爲非義可也他日烏珍又請於帝帝曰察克  
捨父事我可保無他烏珍曰察克於父既不孝於君安  
能忠帝不納天祿五年七月帝幸太液谷留飲三日察  
克謀亂不果帝伐周至尚和山太后與帝祭文獻皇帝  
於行宮羣臣皆醉察克歸見壽安王邀與語王弗從察  
克以謀告耶律瓚都瓚都從之是夕同率兵入弑太后  
及帝因僭位號百官不從者執其家屬至夜開內府物  
見碼碯盃曰此希世寶今爲我有詫于其妻妻曰壽安



王烏珍在吾屬無噍類此物何益察克曰壽安年幼烏珍不過引數奴詰旦來朝固不足憂其黨舒蘓報壽安烏珍以兵圍於外察克尋遣人弑皇后於樞前倉惶出陣壽安遣人諭曰汝等既行弑逆復將若何有額爾奇木和卓委兵歸壽安王餘衆望之徐徐而往察克知其不濟乃繫羣官家屬執弓矢脅曰無過殺此曹爾叱令速出時林牙耶律迪里亦在繫中進曰不有所廢壽安王何以興藉此爲辭猶可以免察克曰誠如公言誰當



使者迪里請與雅斯哈同往說之察克從其計壽安王復令迪里誘察克嚮殺之諸子皆伏誅

拉固字密遜文獻皇帝之子天祿五年遙授武定軍節度使及察克作亂穆宗與烏珍從林牙迪里計誘而出之拉固手刃察克改南京留守穆宗沉湎不恤政事拉固有覬覦之心誘迪里及羣不逞謀逆事覺按問不服帝曰朕爲壽安王時卿數以此事說我今日豈有虛乎拉固不能對及餘黨盡服遂縊於汗州西谷詔有司擇



絕後之地以葬

重元小字布濟吉爾聖宗次子材勇過人眉目秀朗寡言笑人望而畏太平三年封秦國王聖宗崩欽哀皇后稱制密謀立重元重元以所謀白於上上益重之封爲皇太弟歷北院樞密使南京留守知元帥府事重元處戎職未嘗離輦下先是契丹人犯法例須漢人禁勘受枉者多重元奏請五京各置契丹警巡使詔從之賜以金券誓書道宗即位冊爲皇太叔免拜不名爲天下兵



馬大元帥復賜金券四頂帽二色袍尊寵所未有清寧九年車駕獵灤水以其子尼嚕古素謀與同黨陳國王辰類知北院樞密事蕭呼圖克等凡四百餘人誘脅弩手軍陣於帷宮外將戰其黨多悔過効順各自奔潰重元既知失計北走大漠歎曰尼嚕古使我至此遂自殺先是重元將起兵帳前雨赤如血識者謂敗亡之兆子尼嚕古

尼嚕古小字伊囉斡性陰狠興宗一見謂曰此子目有



反相重熙十一年封安定郡王十七年進王楚爲特哩  
袞清寧二年出爲武定軍節度使七年知南院樞密使  
事說其父重元詐病俟車駕臨問因行弑逆九年秋獵  
帝用耶律良之計遣人急召尼嚕古尼嚕古以事泄遽  
擁兵犯行宮南院樞密使許王仁先等率宿衛士討之  
尼嚕古躍馬突出爲近侍詳袞渤海阿蘓護衛蘓射殺  
之

遼史卷一百十二



遼史卷一百十二考證

希達誘埒克亂俱北走爲追兵所獲囚數月縊殺之

按紀稱希達附諸弟爲叛不忍顯戮命自投崖而死  
華格 華格傳舊載卷末其年次事蹟與埒克希達同  
時今易置察克之前

尼嚕固傳清寧二年出爲武定軍節度使 道宗紀作  
三年



遼史卷一百一十二考證



欽定四庫全書薈要卷六千二百三十八

遼史卷一百十三

元中書右丞相總裁托克托等修

列傳第四十三

逆臣中

蕭翰一名迪里字哈準宰相達魯之子天贊初唐兵圍鎮州節度使張文禮遣使告急翰受詔與康未怛往救克之殺其將李嗣昭拔石城會同初領漢軍侍衛八年



伐晉敗晉將杜重威追至望都翰奏曰可令軍下馬而射帝從其言軍士步進敵人持短兵猝至我軍失利帝悔之曰此吾用言之過至此及從駕入汴爲宣武軍節度使會帝崩樂城世宗即位翰聞之委事於李從敏徑趨行在是年秋世宗與皇太后相拒於潢河橫渡和議未定太后問翰曰汝何怨而叛對曰臣母無罪太后殺之以此不能無憾初耶律烏哲以附太后被囚翰聞而快之即因所謂曰汝嘗言我輩不及今在狴犴何也對



曰第願公不至如此翰默然天祿二年尚帝妹額伯哩  
後與天德謀反下獄復結特哩袞瑠格及其弟瓚都亂  
耶律實喇告烏哲烏哲遽入奏翰等不伏帝不欲發其  
事烏哲固諍以爲不可乃詔烏哲鞠案翰伏辜帝竟釋  
之復與公主以書結明王安圖反烏哲得其書以奏翰  
伏誅

德呼字蘇蘭六院額爾奇木博果濟之後天顯中爲中  
臺省右相會同二年與趙思溫持節冊晉帝及我師伐



晉至滹沱河降晉將杜重威德呼功居多大同元年平  
相州之叛斬首數萬世宗即位遣使馳報仍命德呼執  
偏將珠展以來其使誤入珠展營珠展得詔反誘德呼  
執送太后德呼亡歸世宗和約既成封燕王爲南京留  
守天祿五年察克弒逆德呼方醉其妻扶入察克之幕  
因從之明旦壽安王討亂凡脅從者皆棄兵降德呼不  
降陵遲而死妻子皆誅

朗字烏紳季父房阿古齊之孫性輕佻多力人呼爲呼



遜天顯間以材勇進每戰輒克由是得名會同九年太宗入汴命知澶淵控扼河渡天祿元年燕趙以南皆應劉知遠朗與汴守蕭翰棄城歸闕初朗祖阿古齊爲其弟希達詐取額爾奇木自是族中無任六院職事者世宗不悉其事以朗爲六院大王及察克作亂遣人報朗曰事成矣朗遣詳袞蕭呼哩以所部軍往命曰當持兩端助其勝者穆宗即位伏誅籍其家屬

瑠格字明隱太祖兄伊德實之子幼驕狠好陵侮人長



益兇狡太宗惡之使守邊徼累遷西南邊大詳衮會同  
十年叔父安圖從帝伐晉以病先歸與瑠格鄰居世宗  
立於軍中安圖議所往瑠格首建附世宗之策以本部  
兵助之時太后命皇太弟魯庫率兵而南瑠格安圖遇  
于泰德泉既接戰安圖墜馬王子天德馳至欲以槍刺  
之瑠格以身衛安圖射天德貫甲不及膚安圖得馬復  
戰太弟兵敗瑠格與安圖朝於行在及和議成太后問  
瑠格曰汝何怨而叛對曰臣父無罪太后殺之以此怨



耳事平以功爲特哩袞天祿中與弟瓚都王子天德侍  
衛蕭翰謀反耶律實喇發其事瑠格以飾辭免後請帝  
博欲因進酒弑逆帝覺之不果被囚一日召瑠格鎖項  
以博帝問汝實反耶瑠格誓曰臣若有反心必生千頂  
疽死遂貫之耶律烏哲固諍以爲罪在不赦上命烏哲  
按之具服詔免死流烏爾古部果以千頂疽死弟瓚都  
瓚都殘忍多力膚若蛇皮天祿初以族屬爲皮室詳袞  
二年與兄瑠格謀反免死使於轄戛斯國既還復預察



克之亂陵遲而死異母弟二人浩里錫勒戡應歷初無職任以族子甚見優禮三年或告浩里錫勒戡與衛王完謀逆下獄飾辭獲免四年春復反伏誅

哈里字鐸袞隋國王實魯之庶子機警口辯會同五年詔求直言時哈里年十八衣羊裘乘牛詣闕有司問曰汝何故來對曰應詔言事苟不以貧稚見遺亦可備直言之選有司以聞會帝將出獵使謂曰俟吾還則見之哈里曰臣以陛下急於求賢是以來耳今反緩於獵請



從此歸帝聞即召見賜坐問以治道命明王安圖與耶律佛德試之數日安圖等奏曰哈里之材臣等所不及帝召哈里問曰與汝言者何如人也對曰安圖言無收檢若空車走峻坂佛德如著靴行曠野射鵝帝大笑擢宣徽使屢任以事帝知其貧以金器賜之哈里即散於親友後從帝伐晉有功世宗即位於軍中皇太后以兵逆於潢河橫渡太后遣耶律烏哲責世宗自立烏哲至帝前諭旨不屈世宗遣哈里對亦不遜且命之曰汝見



烏哲勿懼哈里見太后還不稱旨既和領太后諸局事  
穆宗即位與冀王迪里謀反死獄中

迪里字烏納六院額爾奇木卓巴勒之子少多詐世宗  
即位爲羣牧都林牙察克謀亂官僚多被繫反壽安王  
與耶律烏哲率兵來討諸黨以次引去察克度事不成  
即詣囚所持弓矢脅曰悉殺此曹迪里進曰殺何益於  
事竊料烏哲將立壽安王故爲此舉且壽安未必知若  
遣人藉此爲辭度可免察克曰如公言誰可使者迪里



曰大王若不疑迪里請與雅斯哈同往說之察克遣之  
壽安王用迪里計誘殺察克凡被脅之人無一被害者  
皆迪里之力亂既平帝嘉賞然未顯用迪里失望居常  
怏怏結羣不逞陰懷不軌應歷二年與其黨謀立拉固  
事覺陵遲死

蕭格小字華格字和多沁國舅房林牙和尚之子警悟  
多智數太平初累遷官職游近習間以諛悅相比昵爲  
流輩所稱由是名達於上重熙初拜北面林牙十二年



爲北院樞密副使帝嘗與近臣宴謂格曰朕知卿才故  
自拔擢卿宜勉力格曰臣不才誤蒙聖知無以報萬一  
惟竭愚衷安敢怠明年拜北府宰相十五年改同知北  
院樞密事格恃權寵同僚具位而已時伊勒希巴耶律  
義先知格姦佞因侍燕言格所短用之將敗事帝不聽  
一日上令義先對格巡擲義先酒酣曰臣備位大臣縱  
不能進忠去佞安能與賊博乎格銜之佯言曰公相謔  
不既甚乎義先詬詈不已帝怒皇后解之曰義先酒狂



醒可治也翌日上詔格謂曰義先無禮可痛繩之格曰

義先之才豈逃聖鑒然天下皆知忠直今以酒過爲罪  
恐拂人望帝以格犯而不校眷遇益厚其矯情媚上多  
此類拜南院樞密使詔班諸王上封吳王改知北院進  
王鄭兼中書令帝大漸詔格曰大位不可一日曠朕若  
弗寤宜即令燕趙國王嗣位清寧元年復爲南院樞密  
使更王楚復徙北院與國舅蕭阿拉同掌朝政格多私  
撓阿拉每裁正之由是有隙出阿拉爲東京留守會南



郊阿拉以例赴闕帝訪羣臣以時務阿拉陳利病言甚  
激切格伺帝意不悅因譖曰阿拉恃寵有慢上心非臣  
子禮帝大怒縊阿拉于殿下後上知格姦計寵遇漸衰  
八年致仕封鄭國王九年秋格以其子爲重元壻格預  
其謀陵遲殺之

遼史卷一百十三



遼史卷一百十三考證

復與公主以書結明王安圖反 明王安圖原文訛明  
安王圖今改正又朗傳朗祖阿古齊原文前作菴古  
只後又作菴谷只並畫一改

瑠格傳會同十年叔父安圖從帝伐晉以病先歸 按  
遼太宗伐晉始於會同六年冬十二月是月即有命  
安圖等由滄恒易定分道進繼以大軍之詔越明年  
春安圖入鴈門圍忻代是年遼晉相持冬復徵兵南



伐明年春與晉數戰遼軍不利至會同九年冬十一月遼乃大敗晉軍晉將杜重威等率部衆降晉帝素服拜命是太宗親征由六年至九年而罷無九年以後事也又會同九年之明年改元大同元年傳稱會同十年尤非今仍原文而識其誤

遼史卷一百十三考證



欽定四庫全書蒼要卷六千二百三十九

遼史卷一百十四

元中書右丞相總裁托克托等修

列傳第四十四

逆臣下

蕭呼圖克字伊遜口吃視斜髮鬢伯父孝穆謂曰是兒  
狀貌族中未嘗有及壯魁梧桀傲多揚人惡重熙中爲  
祇候郎君俄遷興聖宮使尚秦國長公主授駙馬都尉



以不諧離婚復尚齊國公主爲北面林牙清寧中歷北  
南院樞密副使代族兄珠展爲西北路招討使時蕭格  
與蕭阿拉俱爲樞密使不協格以珠展爲阿拉所愛嫉  
之珠展受代赴闕嘗借官粟留直而去呼圖克希格意  
發其事珠展因得罪呼圖克天欲要權歲時遺珍玩畜  
產于格二人相愛逾兄弟呼圖克族弟迪里爲北寇薦  
國舅詳袞蕭呼敦于呼圖克呼圖克見其辨給壯勇傾  
交每休沐言論終日人皆怪之會呼圖克同知北院樞



密事奏呼敦及迪里可用帝以迪里爲旗鼓伊喇詳袞  
呼敦爲宿直官及格構陷其兄阿拉呼敦陰爲之助時  
人醜之耶律伊遜知北院樞密事呼圖克位在伊遜下  
怏怏不平初呼圖克與重元子尼嚕古謀逆欲其速發  
會車駕獵太子山遂與尼嚕古脅弩手軍犯行宮既戰  
尼嚕古中流矢而斃衆皆逃散時同黨耶律撒喇蘇在  
圍場聞亂率獵夫來援其黨謂呼圖克等曰我軍甚衆  
乘其無備中夜決戰事冀有成若待旦其誰從我呼圖



克曰倉卒中黑白不辨若內外軍相應則吾事去矣黎  
明而發何遲之有重元聽呼圖克之計令四面巡警待旦  
是夜同黨立重元僭位號呼圖克自爲樞密使明日戰  
敗呼圖克被創單騎遁至十七灤投水死五子同日誅  
蕭德勒岱字和多沁國舅少父房之後父雙寬尚塔納  
公主仕至國舅詳袞德勒岱幼警敏不羈好射獵太平  
中以外戚補祇候郎君歷延昌宮使殿前都點檢重熙  
十三年伐夏德勒岱將偏師首入敵境多所俘掠遷都



點檢改烏爾古德呼勒部都詳袞十八年再舉西伐德  
勒岱奏軍馬器械之事在選將夏人豈難制但嚴設斥  
堠不用掩襲計何慮不勝帝曰卿其速行無後師期既  
而德勒岱失利還復爲都點檢十九年夏人來侵金肅  
軍上遣德勒岱畜輕兵督戰至河南三角川斬候者八  
人擒觀察使以功命知漢人行宮都部署事出爲西南  
面招討使族弟黃巴家奴告其主私議宮掖事德勒岱  
寢之事覺決大杖削爵爲民清寧中上以所坐事非德



勒岱所犯起爲南京統軍使至是從重元子尼嚕古等  
亂敗走被擒伏誅

庫德本宮分人不知姓氏好戲狎不喜繩檢膂力過人  
善擊鞠重熙初爲護衛歷宿直官十三年西征以庫德  
爲先鋒夏人伏兵掩之庫德力戰麾下士多歿乃單騎  
突出遇夏王李元昊來圍勢甚急庫德馳射應弦輒仆  
躍馬直擊中堅夏兵不能當晡乃還營改興聖宮太保  
清寧九年從重元尼嚕古亂與扈從兵戰敗而遁追擒



之陵遲而死

撒喇蘇孟父房迪里之孫性兇暴清寧中累遷宣徽使  
改殿前都點檢首與重元謀亂會帝獵灤河重元恐事  
泄與扈從軍倉卒而戰其子尼嚕古旣死同黨潰散撒  
喇蘇遣在畋所聞亂刼獵夫以援旣至知尼嚕古已死  
大悔恨之謂曰我輩惟有死戰胡爲若兒戲自取殞滅  
今行宮無備乘夜刼之大事可濟若俟明旦彼將有備  
安知我衆不携貳一失機會悔何及重元蕭吁圖克等



曰今夕但可四面圍之勿令外軍得入彼何能備不從  
遲明投杖而走撒喇蘇戰死

奚和哩布一名翰字綏蘭奚王特哩之後善騎射趨捷  
而勇與其兄必埒哩齊名大安中車駕幸中京補護衛  
稍遷鐵鷄軍詳衮天慶間徙北女直詳衮兼知咸州路  
兵馬事改東京統軍旣而諸蕃入寇悉破之遷奚六部  
大王兼總知東路兵馬事保大二年金兵至天祚播遷  
和哩布率吏民立秦晉國王淳爲帝淳僞署和哩布知



北院樞密事兼諸軍都統屢敗宋兵淳死其妻普賢女攝事明年金兵由居庸關入和哩布知北院卽箭筈山自立號奚國皇帝改元天復設奚漢渤海三樞密院改東西節度使爲二王分司建官時奚人巴齋罕嘉努等引兵擊附近契丹部落劫掠人畜羣情大駭會和哩布爲郭藥師所敗一軍離心其黨耶律阿固齊與其甥伊實巴沁等殺之僞立凡八月

蕭特烈字額都溫約尼溫汗宮分人乾統中入直宿衛



出爲順義軍節度使天慶四年同知咸州路兵馬事五年以行軍敗奪節度使保大元年遷威節度使及天祚在山西集羣牧兵特烈爲副統軍聞金兵將至特烈諭士卒以君臣之義死戰于石輦地金兵不戰特烈伺間欲攻之天祚喜甚召嬪御諸子登高同觀將詭之金兵望日月旗知天祚在其下以勁兵直趨奮擊無敢當者天祚遁走特烈所至招集散亡尋爲中軍都統復敗于梯己山天祚決意渡河奔夏從臣切諫不聽人情惶



懼不知所爲特烈陰謂耶律烏哲曰事勢如此億兆離  
心正我輩效節之秋不早爲計奈社稷何遂共劫梁王  
雅里奔西北諸部僞立爲帝特烈自爲樞密使雅里卒  
欲擇可立者會耶律烏哲言珠拉才德純備兼興宗之  
孫衆皆曰可遂僭立焉特烈僞職如故未三旬與珠拉  
俱爲亂兵所殺

論曰遼之秉國鈞握兵柄節制諸部帳非宗室外戚不  
使豈不以爲帝王久長萬世之計哉及夫肆叛逆致亂



亡皆是人也有國家者可不深戒矣乎

遼史卷一百十四



遼史卷一百十四考證

奚和哩布傳明年金兵由居庸關入和哩布自立按  
本紀及續通鑑金兵至居庸及和哩布僭立並保大  
三年事傳上文云保大二年此處原文是年二字應  
作明年今改正



遼史卷一百十四考證



欽定四庫全書薈要卷六千二百四十

遼史卷一百十五

元中書右丞相總裁托克托等修

二國外紀第四十五

高麗

高麗自有國以來傳次久近人民土田歷代各有其志  
然高麗與遼相爲始終二百餘年自太祖皇帝神冊間  
高麗遣使進寶劍天贊三年來貢太宗天顯二年來貢



會同二年受晉上尊號冊遣使往報聖宗統和三年秋

七月詔諸道各完戎器以備東征高麗八月以遼澤沮

洳罷師十年以東京留守蕭恒德伐高麗十一年王治

遣朴良柔奉表請罪詔取女直國鴨綠江東數百里地

賜之十二年入貢三月王治遣使請所俘生口詔贖還

之仍遣使撫諭十二月王治進妓樂詔却之十三年治

遣李周楨來貢又進鷹十月遣李知白來貢十一月遣

使冊治爲王遣童子十人來學本國語十四年王治表



乞爲婚姻許以東京留守駙馬蕭恒德女下嫁之六月  
遣使來問起居自是至者無時十五年韓彥敬來納聘  
幣駙馬蕭恒德妻越國公主薨十一月治薨其姪誦遣  
王同穎來告十二月遣使致祭詔其姪記權知國事十  
六年遣使冊誦爲王二十年誦遣使賀伐宋之捷七月  
來貢本國地里圖二十二年以南伐事詔諭之二十三  
年高麗聞與宋和遣使來賀二十六年進龍鬚草席及  
賀中京城二十七年承天皇帝太后崩遣使報以國哀二



十八年誦遣魏守愚等來祭三月使來會葬五月高麗  
西京留守康肇弑其主誦擅立誦從兄詢八月聖宗自  
將伐高麗報宋遣引進使韓杞宣問詢詢奉表乞罷師  
不許十一月大軍渡鴨綠江康肇拒戰于銅州敗之肇  
復出右皮室詳袞耶律達魯擒肇等追奔數十里獲所  
棄糧餉鎧仗銅霍貴寧等州皆降詢上表請朝許之禁  
軍士俘掠以政事舍人馬保祐爲開京留守安州團練  
使旺布爲副留守太子太師伊林將騎兵一千送保祐



等赴京守將卓思正殺我使者韓喜孫等十人領兵出拒保祐等復還伊林領兵擊之思正遂奔西京圍之五日不克駐驛于城西佛寺高麗禮部郎中渤海托實來降遣巴雅爾博諾攻開京遇敵于京西敗之詢棄城走遂焚開京至清江而還二十九年正月班師所降諸城復叛至貴德州南峻嶺谷大雨連日霽乃得渡馬駝疲乏甲仗多遺棄次鴨綠江以所俘人分置諸陵廟分賜內戚大臣開泰元年詢遣蔡忠順來乞稱臣如舊詔詢



親朝八月遣田拱之奉表稱病不能朝詔復取六州之地二年耶律資忠使高麗取地未幾還三年資忠復使如前索地五月詔國舅詳袞蕭迪里東京留守耶律托實等造浮梁于鴨綠江城保宣義定遠等州四年命北府宰相劉慎行爲都統樞密使耶律世良爲副殿前都點檢蕭實喇爲都監慎行挈家邊土致緩師期追還之以世良實喇總兵伐高麗五年世良等與高麗戰于郭州西破之六年樞密使蕭和卓爲都統漢人行宮都部



署王繼忠爲副殿前都點檢蕭實喇爲都監進討蕭和  
卓攻興化軍不克師還七年詔東平郡王蕭巴雅爾爲  
都統蕭實喇爲副統東京留守耶律巴噶爲都監復伐  
高麗十二月蕭巴雅爾與戰于茶陀二河之間我軍不  
利天雲右皮室二軍沒溺者衆天雲軍詳袞哈里約尼  
帳詳袞阿克達客省使卓庫渤海詳袞高清明等皆陣  
亡八年詔數巴雅爾討高麗罪釋之賞將校功益封戰  
沒將校妻錄其子弟以南皮室有功賜衣服銀絹有差



出金帛賜約囉尼格二奚軍八月遣郎君克伯里等率  
諸部軍會大軍同討高麗詢遣使來乞貢方物九年資  
忠還以詢降表進釋詢罪太平元年詢薨遣使來報嗣  
位卽遣使冊王欽爲王九年賜欽物十一年聖宗崩遣  
使告哀七月使來慰奠興宗重熙七年來貢十二年三  
月以加上尊號來賀十三年遣使來貢三十四年三月  
又來貢十五年入貢八月王欽薨遣使來告十六年來  
貢明年又來貢十九年復貢六月遣使來賀伐夏之捷



二十二年入貢二十三年四月王徽請官其子詔加檢校太尉興宗崩道宗即位清寧元年八月遣使報國哀以先帝遺物賜之十一月使來會葬二年三月來貢四年春遣使報太皇太后哀五月使來會葬咸雍七年八年來貢十二月以佛經一藏賜徽九年十年來貢太康二年三月皇太后崩遣使告哀六月使來弔祭四年王徽乞賜鴨綠江以東地不許九年八月王徽薨以徽子三韓國公勲權知國事十二月勲薨大安元年冊勲子



運爲國王二年遣使來謝封冊三年來貢四年三月免  
歲貢五年六年連貢九年賜王運羊十年運薨子昱遣  
使來告卽賻贈壽隆元年來貢十一月王昱病命其子  
顯權知國事二月來貢三年三月王昱薨五年王顯乞  
封冊六年封顯爲三韓國公七年道宗崩天祚即位改  
爲乾統元年報道宗哀使來慰奠十二月遣使來賀五  
年三韓國公顯薨子侯遣使來告八年封侯爲三韓國  
公贈其父顯爲國王十二月遣使來謝九年來貢天慶



二年王俱母薨來告遣使致祭起復三年遣使來謝致祭又來謝起復十年乞兵于高麗以禦金而金人責之至是遼國亡矣

### 西夏

西夏本魏拓跋氏後其地則赫連國也遠祖思恭唐季受賜姓曰李涉五代至宋世有其地至李繼遷始大據夏銀綏宥靜五州緣境七鎮其東西二十五驛南北十餘驛于德明曉佛書通法律嘗觀太一金鑑訣野戰歌



製番書十二卷又製字若符篆其俗衣白窄衫羶冠冠  
後垂紅結綬自號威明設官分文武其冠用金縷貼間  
起雲銀紙貼緋衣金塗銀帶佩蹠蹠解錐短刀弓矢穿  
靴禿髮耳重環紫旋襪六襲出入乘馬張青蓋以二旗  
前引從者百餘騎民庶衣青綠革樂之五音爲一音裁  
禮之九拜爲三拜凡出兵先卜有四一灸博焦以艾灼  
羊脾骨二擗算擗竹于地以求數若揲著然三呪羊其  
夜牽羊焚香禱之又焚穀火于野次晨屠羊腸胃通則



吉羊心有血則敗四矢擊絃聽其聲知勝負及敵至之期病者不用醫藥召巫者送鬼西夏語以巫爲斯也或遷他室謂之閃病喜報仇有喪則不伐人負甲葉於背識之仇解用雞猪犬血和酒貯於髑髏中飲之乃誓曰若復報仇穀麥不收男女禿癩六畜死蛇入帳有力小不能復仇者集壯婦享以牛羊酒食趨讎家縱火焚其廬舍俗曰敵女兵不祥輒避去訴于官官擇舌辨氣直之人爲和斷官聽其曲直殺人者納命價錢百二十千



土產大麥華豆青稞床子古子蔓鹹地蓬實薇蓉苗小  
蕪荑席雞草子地黃葉登廂草沙葱野韭拒灰蓀白蒿  
鹹地松實民年十五爲丁有二丁者取一爲正軍負擔  
雜使一人爲抄四丁爲兩抄餘人得射完丁皆習戰鬪正  
軍馬馳各一每家自置一帳團練使以上帳弓各一箭  
五百馬一索馳一旗鼓五槍劍棍棒抄袋雨氈渾脫鍬  
鑊箭牌鐵箭箠各一刺史以下人各一馳箭三百毛幕  
一餘兵三人共一幕有礮手二百人號伯奇勇健者號



撞令卽齋糧不遇一旬晝則舉煙揚塵夜則燐火爲號  
若獲人馬射之號曰殺鬼招魂或射草縛人出軍用單  
日避晦日多立虛寨設伏兵衣重甲乘善馬以鐵騎爲  
前鋒用鈎索絞聯雖死馬上下落其民俗勇悍衣冠騎  
乘土產品物子姓傳國亦畧知其大槩耳初西夏臣宋  
有年賜姓曰趙迨遼聖宗統和四年繼遷叛宋始來附  
遼授特進檢校太師都督夏州諸軍事遂復姓李十月  
遣使來貢六年入貢七年來貢以王子帳耶律襄之女



封義成公主下嫁繼遷八年正月來謝三月又來貢九月繼遷遣使獻宋俘十月以敗宋軍來告十二月下宋麟廊等州來告遣使封繼遷爲夏國王九年二月遣使告伐宋之捷四月遣李知白來謝封冊七月復銀綏二州來告十月繼遷以宋所授敕命遣使來上是月定難軍節度使李繼捧來附授開府儀同三司檢校太師兼侍中封西平王仍賜推忠效順啓聖定難功臣十二月繼遷潛附于宋遣韓德威持詔諭之十年二月韓德威



還奏繼遷託故不出至靈州俘掠以還西夏遣使來奏  
德威俘掠賜詔撫諭十月來貢十二年入貢十三年敗  
宋師遣使來告十四年又來貢十五年三月以破宋兵  
來告封繼遷爲西平王六月遣使來謝封冊十六年來  
貢十八年授繼遷子德明朔方軍節度使十九年遣李  
文冀來貢六月奏下宋恒環慶三州賜詔褒美二十年  
遣使來進馬駝六月遣劉仁勗來告下靈州二十一年  
繼遷薨其子德昭遣使來告六月贈繼遷尚書令遣西



上閣門使丁振弔慰八月德昭遣使來謝弔贈二十二  
年三月德昭遣使上繼遷遺留物七月封德昭爲西平  
王十月遣使來謝封冊二十三年下宋青城來告二十  
五年德昭母薨遣使弔祭起復二十七年承天皇后  
崩遣使報哀于夏二十八年遣使冊德昭爲夏國王開  
泰元年德昭遣使進良馬二年遣引進使李延弘賜夏  
國王李德昭及義成公主車馬太平元年來貢十一年  
聖宗崩報哀于夏德昭遣使來進賻幣興宗即位以興



平公主下嫁李元昊以元昊爲駙馬都尉重熙元年夏  
國遣使來賀李德昭薨冊其子夏國公元昊爲王二年  
來貢十二月禁夏國使沿路私市金鐵七年來貢李元  
昊與興平公主不諧公主薨遣北院承旨耶律庶成持  
詔問之九年宋遣郭禎以伐夏來報十年夏國獻所俘  
宋將及生口十一年遣使問宋興師伐夏之由十二月  
禁托歡鬻馬于夏沿邊築障塞以防之十二年正月遣  
樞密都承旨王惟吉諭夏國與宋和二月元昊以加上



尊號遣使來賀耶律迪里等使夏國還奏元昊罷兵遣使報宋四月夏國遣使進馬駝七月元昊上表請伐宋不從十月夏人侵党項遣延昌宮使高嘉努讓之十三年四月党項及山西節度使厚烈以五部叛入西夏詔徵諸道兵討之六月準布子烏巴執元昊八月夏使對不以情羈之使復來詢事宜不實對答之十月元昊上表請罪欲收集叛黨以獻從之進方物命北院樞密副使蕭格送之元昊率党項三部來降詰其納叛背盟



元昊伏罪初夏人執蕭呼圖克至是請以被執者來歸  
詔所留夏使亦還國十二月呼圖克來歸又遣使來貢  
十七年元昊薨其子諒祚遣使來告上其父遺留物圖  
伯特國乞以本部軍助攻夏國不許十八年復議伐夏  
留其賀正使不遣遣北院樞密副使蕭惟信以伐夏告  
宋六月夏國遣使來貢留之七月親征八月渡河夏人  
遁九月蕭惠爲夏人所敗十月招討使耶律特里袞率  
準布軍至賀蘭山獲元昊及官屬遇其軍三千來拒



殪之詳衮蕭慈實努南克耶律幹里歿于陣十九年正

月遣使問罪于夏夏將鄂博等攻金肅城耶律高嘉努

等破之鄂博被創遁去殺威琿乙靈紀三月殿前都點

檢蕭德勒岱與夏軍戰于三角川敗之招討使蕭博諾

北院大王宜新等帥師伐夏都部署布古德爲監戰五

月蕭博諾等入夏境不遇敵縱軍俘掠而還夏國鄂博

來降十月李諒祚母遣使乞依舊稱臣十二月諒祚上

表如母訓二十年二月遣使索党項叛戶五月蕭庸克



使夏回進諒祚母表乞代党項權進馬駝牛羊等物又  
求唐隆鎮仍乞罷所建城邑以詔答之六月獲元昊妻  
及俘到夏人置于蘇州二十一年十月諒祚遣使乞弛  
邊備遣庸克賚詔諭之二十二年七月諒祚進降表遣  
林牙高嘉努賚詔撫諭二十三年正月貢方物五月乞  
進馬駝詔歲貢之七月諒祚遣使求婚十月進誓表興  
宗崩遣使報哀于夏二十四年道宗即位清寧元年遣  
使來賀九月以先帝遺物賜夏四年四月遣使會葬九



年正月禁民鬻銅于夏咸雍元年五月來貢三年十一

月遣使進回鶻僧金佛梵覺經十二月諒祚薨四年二

月諒祚子秉常遣使報哀即遣使弔祭秉常上其父遺

物十月冊秉常爲夏國王十二月來貢五年七月遣使

來謝封冊十一月秉常乞賜印綬九年遣使來貢太康

二年正月仁懿皇后崩遣使報哀于夏以皇太后遺物

賜之遣使來弔祭五年來貢八年二月遣使以所獲宋

將張天益來獻大安元年十月秉常遣使報其母哀二



年十月秉常薨遣使詔其子乾順知國事十二月李乾

順遣使上其父秉常遺物四年七月冊乾順爲夏國王

五年六月遣使來謝封冊八年六月夏爲宋所侵遣使

乞援壽隆三年六月以宋人置壁壘于要地遣使來告

四年六月求援十一月遣樞密直學士耶律儼使宋諷

與夏和夏復遣使求援五年正月乾順伐布木剌實等

部十一月夏以宋人罷兵遣使來謝六年十一月遣使

請尚公主七年道宗崩遣使告哀于夏遣使來慰奠天



祚即位乾統元年夏遣使來賀二年復請尚公主又以  
爲宋所侵遣李造福田若水來求援三年復遣使請尚  
公主十月使復來求援四年五年李造福等至乞援以  
族女南仙封成安公主下嫁乾順六年正月遣牛溫舒  
使宋令歸所侵夏地六月遣李造福來謝八年乾順以  
成安公主生子遣使來告九年以宋不歸地來告十年  
遣李造福等來貢天慶三年六月來貢保大二年天祚  
播遷乾順率兵來援爲金師所敗三年乾順請臨其國



六月遣使冊乾順爲夏國皇帝而天祚被執歸金矣  
論曰高麗西夏之事遼雖嘗請昏下嫁烏足以得其固  
志哉三韓接壤反覆易知涼州貢遠納叛侵疆乘隙輒  
動貢使方往事繫隨生與師問罪屢煩親征取勝固多  
敗亦貽悔昔與趙咨對魏之言也大國有征伐之兵小  
國有備禦之固豈其然乎先王柔遠以德而不以力尚  
矣遼亡求援二國雖能出師豈金敵哉



遼史卷一百十五



遼史卷一百十五考證

高麗傳自太祖皇帝神冊間高麗遣使進寶劍按遼  
太祖本紀高麗進寶劍在九年是時尚未建元九年  
之明年始稱神冊元年此似紀年之誤

聖宗統和十二年入貢 原文訛十三年今據聖宗本  
紀改

開泰四年命北府宰相劉慎行爲都統 劉慎行按聖  
宗紀作劉晟



咸雍七年 原文無咸雍二字按道宗本紀清寧間俱  
不紀高麗入貢至咸雍七年始來貢八年又入貢賜  
以佛經一藏據此則爲咸雍無疑也

太康九年八月王徽薨 按宋史及通考王徽卒于勲  
嗣百日卒弟運嗣四年卒于堯嗣未幾卒世叔父熙  
嗣避遼諱改名顯顯卒于悛嗣是王運非勲子運子  
昱又名堯顯非昱子顯初名熙也紀內所載多與二  
書不合



西夏傳每家自置一帳團練使以上帳弓各一箭五百  
馬一 原文每家自置一家於義無解據宋史一家  
號一帳則下家字爲帳字之誤又原文張弓矢各一  
馬五百匹按宋史張作帳箭五百馬一今並據宋史  
改正

統和九年遣李知白來謝封冊 李知白按聖宗紀作  
杜白又高麗紀統和十三年遣李知白來貢二國使  
臣同名而此處又與本紀互異



定難軍節度使李繼捧來附 按繼捧未嘗附契丹蓋  
繼遷之誤

繼遷子德明 按宋史夏國傳繼遷子德明未嘗改名  
德昭遼史前稱繼遷子德明後連云德昭應係傳寫  
之訛

重熙十三年六月準布于烏巴執元昊 按興宗紀李  
元昊來援叛黨準布長烏巴執元昊遣來援使斡里  
噶拉來與傳云執昊互異



招討使耶律迪魯回 按興宗紀作敵魯古此又作敵

古今畫一改



遼史一百十五考證





總校官原候補府目葉佩蓀

校對官編修 戶口天錫麒

謄錄監生 戶口孫樹新